



我心安處是吾鄉

我姓張，五年前嫁咗俾個香港人，喺一年前，先至攞到單程証嚟香港住。我同老公、個女、老爺、奶奶，仲有老公個細佬同佢女朋友，都住埋喺一個公屋單位入面。

唉，一家人，淨係得我老公搵錢養晒頭家，經濟真係「搵搵緊」，揸住十元八塊去買餸，真係唔知可以買啲乜。最慘嘅就係我老公嘅阿哥，一家三口，間中又會攞雙程証落嚟香港住吓，你可以想像一下，一間公屋住十個人，係幾咁擠迫，「啖霎」都會多啲啦！

自從嚟咗香港之後，我同老公相處嘅時間無疑係多咗，但係磨擦亦都跟住多咗，尤其是喺照顧個女方面，我哋嘅意見完全唔同，我覺得佢都唔肯聽我講，死牛一便頸，一啲都唔識關心同體諒我。

最激氣嘅係，有時因為我同老爺、奶奶教個女嘅意見唔一樣，有啲「啖霎」，我老公就唔理三七二十一，鬧咗我先算，仲要我哋唔理佢哋。所謂「幫理不幫親」咁嘛，做人點可以「勵橫折曲」嘅呢？我咪據理力爭，同佢嘈囉，點知佢竟然用粗口鬧我，仲郁手打我，我真係唔敢相信，我咁仆心仆命為頭家，佢竟然會咁樣對我！

有次我同奶奶嘈交，仲被佢哋趕咗出嚟，我同個女唯有喺街度流離浪蕩，都唔知點算好，好在有個青少年中心嘅社工見我咁可憐，就轉介俾綜合家庭服務中心嘅社工跟進。

唉，邊個話落嚟香港就有好世界？我喺香港無人無物，留喺度又過得唔開心，所謂「寧吃開眉粥，不吃愁眉飯」，我寧願返番國內生活，都唔情願留喺個咁嘅家，希望綜合家庭服務中心嘅姑娘可以幫到我。

(578 字)